

T 3188/0.83

76

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
DEC 17 1940

湖南通志卷之一百九

哈佛大學漢和  
圖書館珍藏印

人物三

長沙府三

明

尹尙賓姓譜茶陵人嘉靖丙戌進士授戶部主事遷  
郎中理鹽廠有商挾賂求私不聽商復賂他人事覺  
尙賓皜然無所污

彭應洪府志字玉山茶陵人母病割股進之母愈州  
牧旌其孝

鄺宗舜楚風補醴陵人少聰穎負才名甘貧篤學中  
嘉靖戊子鄉試第一事親孝定省外卽閉戶讀書太

守潘鎰嘗造廬諮焉見書卷盈几乃二十一史叩之如宿記者

袁球府志醴陵人嘉靖中貢生授建平訓導以孝友自勵言行皆可師法涖官深嚴義利之介祀名宦

廖希顏楚風補字叔愚茶陵人嘉靖壬辰進士知高安有異政陞工部主事扈駕承天上常嘆廖希顏才識精敏擢山西提學教育人才有河汾之譽時海賊熾御史檄希顏勦捕熾厥渠魁進浙江廉使旋卒所至入名宦

劉欽薦府志號少東攸縣人嘉靖中由鄉舉令邢臺有積盜匿巨璫所欽薦捕之寘重典璫怒嗾巡按鄢

懋卿中以法鄢撫其行無可議又以增建邢城有功例應紀錄鄢不得已中以浮躁降級歸田嘗爲父卜墳裸眠雪中崇禎時祀鄉賢

陳惟順府志號南崖攸縣人官光祿丞嘗隨湛甘泉至廣南受學甘泉作壯哉行以嘉之邑文廟及西郭橋皆其所建

文有章府志攸縣人少失恃事繼母撫幼弟各極愛敬學綜古今從遊者甚衆子士昂令蜀晉給諫封有章文林郎卒贈徵仕郎祀鄉賢

李廷龍府志湘陰人嘉靖間登進士節推徽郡巡督淮揚歷福建布政四川巡按皆有美績民立祠祀之

張武一統志瀏陽人豁達有勇力稍涉書史爲燕山護衛百戶從起兵累功封成陽侯卒贈潞國公諡忠毅

胡廷輔一統志瀏陽人嘉靖進士授戶部主事轉工部員外郎嘗奏罷蘇杭監造歲費省數千金陞廣東南雄知府

鄧巍一統志瀏陽人嘉靖進士授溧水知縣入爲御史疏劾權貴拜杖直聲凜然奉命巡邊嘗以單騎按行營伍歷鳳陽知府歲饑賑卹全活者數萬致仕歸年八十五卒

張環安化縣志嘉靖丙戌父永定率衆捕賊遇害環仰天號哭誓報父仇因揮淚血戰身中數十鎗而死王以文湘鄉縣志嘉靖三年賊劫鄉民以文率鄉兵勦捕手刃五賊乘勝追逐賊要擊之以文戰死姪用器奮身赴難亦遇害知縣鄒山齡祭詞有云伯有卹鄰之義姪近顧親之孝

李棠一統志字石塘長沙人隆慶進士授禮部主事告歸用薦起官歷僉都御史宣大總督王崇古以俺答就撫條封貢八事廷議紛紜獨棠極言當許帝從之巡撫南贛討平韶州山賊終南京吏部右侍郎仕宦三十年不營生產以介潔稱天啓初追諡恭懿

李禎明史列傳字維卿安化人隆慶五年進士除高

平知縣徵授御史萬歷初傳應禎以直言下詔獄禎與同官喬巖給事中徐貞明擁入護視之坐謫長蘆鹽運司知事遷歸德推官禮部主事三遷順天府丞十八年洮河有警極言貢市非策因歷詆邊吏四失帝以納款二十年不當咎始事遂寢其議以右僉都御史巡撫湖廣言知縣梁道凝循吏反注下考宜懲挾私者以勵其餘薦舉屬吏不應專及高秩下僚如趙蛟楊果者亦當顯旌之蛟果萬歷初以吏員超擢者也詔皆報可召爲左僉都御史再遷戶部右侍郎尋調兵部進左侍郎二十四年日本封貢事償首輔趙志臯尙書石星俱被劾廷臣議戰守章悉下兵部

禎等言今所議惟戰守封三事封則李宗城雖徵楊方亨尙在若遽議罷無論中國數百人淪於異域而我兵食未集勢難遠征宜令方亨靜俟關白來迎則封不迎則止我以戰守爲實務而相機應之且朝鮮素守禮王師所屯宜嚴禁擾掠得旨如議而疏內言志臯星當去志臯自是不悅明年星得罪命禎攝朝事禎以平壤王京釜山皆朝鮮要地請修建大城與屯開鎮且列上戰守十五策俱允行後又數上方畧四川被寇禎言鎮虜堡爲漳臘門戶虹橋關爲松城咽喉關堡之外或嶺或崖皆可據守守阿玉嶺則不能越咂際而窺堡守黃勝場則不敢踰塞墩而寇關

他如橫山寡石崖尤爲要害皆當亟議防禦令撫鎮臣計畫以聞報可禎質直方剛署事規畫頗當有欲卽用爲尙書者志臯及張位沈一貫況上進等皆阻之帝亦不聽會甘肅缺巡撫禎以劉敏寬名上給事楊應文言敏寬方坐事勘不當推舉帝以詰禎禎言前奉詔敏寬須巡撫缺用帝怒禎不引罪調之南京尋致仕久之起南京刑部尙書踰年復引疾不俟報徑歸帝怒大學士葉向高言禎實病不可深責帝竟奪禎職閒住未幾卒

陳關府志安化人事親孝母病思肉食時祈雨禁屠關刲股以進母尋愈事聞表其門

李維基府志安化人家貧兄維肇病足維基力田事母兄病草醫謂食糞可愈乃調糞自飲始進兄卒痛哭至咯血

賀廷弼府志號遜菴安化貢生任汝川梁山兩邑擢陝西漢中府同知政尙平恕士民德之

林之蘭府志字芳麓安化例貢初授苑馬監陞瑞州通判署府事一日出行見市店烟突中露一手作招搖狀呼店主鞠之乃謀殺比舍郎瘞竈下掘驗寘於法部民稱之爲林青天

黃洽中一統志字景臺善化人萬歷進士標格孤介初知歸安縣有聲歷戶部郎知太原南安二府所至

畏其清強在太原奏蠲地畝荒稅二萬餘兩在南安蠲木價五萬緡屢遷邊才不就家居杜門不出課諸子悉有文名

李孚府志湘潭人早孤鞠於母周性剛耿豪猾屢中以奇禍家盡破風骨益峻事親課子子騰芳成進士先是騰芳爲督學所首拔至是孚走謝邵陵有謀居間者因僧以百金壽孚却之二子俱貴隱居山中每封勅至強之詣城拜命後卽策蹇遊歸騰芳爲宗伯歸省製一文穀以進服片時卽解去年八十一偶屬疾諸子歸環問之起步庭中日緣合則聚盡則散耳次早端坐逝

李騰芳一統志孚子萬歷進士入內閣掌制誥以忤魏忠賢削籍歸忠賢誅擢禮部侍郎召對條奏悉稱旨晉尙書卒贈太子太保

周之基府志湘潭人萬歷中歲進士補蠡縣令蠡多璫族骫法憚之基悉爲斂跡行取刑部主事上封貢議遷郎中出守端州有欲中傷之者遂拂衣歸

王命宣府志字荷雲湘潭人庠生貧時事二人養志不匱母病嘗藥滌腴無少懈督學屢旌其孝爲松滋訓導擢永州教授舉廢拯貧咸有化澤祀鄉賢尹長民府志湘潭人甘貧力學多陰行善事性孝母病割股療之遂愈



胡應台一統志字徵吉瀏陽人萬歷進士官兵科給事中轉吏科以直忤時相出爲江西督學稱得人歷太僕卿巡撫應天振綱肅紀執法不阿旋督兩廣威名益著召爲南京刑部尙書以忤璫奪職崇禎初起南兵部尙書疏乞終養歸

黎維府志瀏陽人性孝謹父病願以身代比歿哀毀幾絕廬墓三年遇虎不爲害偶夜深將之墓所有人艤舟渡之忽不見

徐應選楚風補字青仲號止菴益陽舉人性孝謹長喜任俠癸未獻賊犯境倡義拒之未幾卒所著有檀樂舊業

羅喻義一統志字莢江益陽人萬歷進士天啓初官南京國子祭酒諸生陸萬齡等請爲魏忠賢立祠太學右喻義懲其倡率者三人乃止忠賢聞之大怒削籍崇禎中歷官禮部左侍郎充日講官撰尙書講義於正文外旁及時事以違例革職卒諡文介

陶顯功府志字膚仲寧鄉人生時母夢壽字懸天上以拔貢司訓歸安歷教蓬溪階州所在起文譽張江陵欲破格用之擢中江令治行甚著考最陞路南知州二年解組還優游林泉三十餘年壽九十三

喬光顧府志寧鄉人萬歷中爲善化丞志潔履芳獨甘清苦一切時例力爲剷除篤愛小民留心學校未

幾以內艱去

劉常吉府志號心和湘鄉人由監生選陝西都幕憲司重之檄攝藍田縣事訪民間疾苦陳於上官剔弊緩徵民戴如慈母薦擢兩淮鹽運同知未赴卒於任藍田民赴哭者以千計秦王聞其賢發宮中秘器賻之

龍應濱府志號思庭湘鄉人知長寧縣土廣而沃奸人逋賦以累平民里胥呼迫多匿山谷爲盜應濱輦家貲代償之奸民感其義咸改轍樂輸無復爲盜者與學課士修祠葺橋隨在一新攝永安和平二篆政如長寧致仕歸所治士民各建生祠樹碑頌之

黃文煥府志號象斗湘鄉人萬歷間武舉從將軍劉縱征播陣歿勅有司旌其門

陳良義府志湘鄉人萬歷間歲饑良義與其弟良芳先後賑穀萬餘石詔給冠帶建坊旌之良義子九官光祿寺典簿良芳子九棘冠帶儒士皆以義行濟美張嘉言府志字克揚湘潭人萬歷進士任廣州司理時有旱驚妖僧奇獄力雪其冤廣州人立祠以祀

唐斯盛湖廣通志湘潭人天性純粹事母孝謹母嘗以細過怒其下斯盛負杖膝行以進母意便解家人事之者皆云自幼至老未嘗見其有怒色登萬歷中進士任蘇州司理以除惡忤當路改衢州教授捐俸

置學田以養寒士累官南京戶部郎

唐選府志湘潭人萬歷進士令江津值諸司符下以楊應龍叛飭令用兵選力持應龍不反狀弗聽已而兵連禍結逾年始平人咸服其遠識擢吏部郎故事銓曹無議外轉者選循例應主銓政憮然曰近事黜陟多失吾不能爲人署紙尾力求外出補浙江按察使銓曹外轉自選始

丁嵩府志醴陵人萬歷時與錢可賓文宗瀾俱以善行旌

劉淑龍府志醴陵人由中書舍人陞大理寺副直中秘修校國史玉牒改南京戶部員外水兌抽分羨金悉歸諸公擢守鎮遠軫民瘼興學校化苗習釋誣枉致仕歸囊篋蕭然贈戶部郎中

施溥府志醴陵人性孝母董氏疾顛天割股作羹進之母食之美問之託辭以對病立愈及母卒廬於墓側哀號如始喪有二烏栖樹間溥哭輒悲鳴

丁淑府志字師孟醴陵舉人任河南寶豐教諭發粟賑饑大吏嘉其才薦陞陝西麟遊令任三月與上官忤卽自劾歸嘗掘地得金悉以分布里閭里人作散金歌紀其事

唐寅府志醴陵舉人父伯遜卒於嘉魚寅奉柩經洞庭烈風驟起泣禱旋止初爲光山訓導以實行教人

陞岷府教授鎮南王甚重之命纂史學提要行於世  
尋丁母艱王親畫其像以誌景慕

孫泰府志醴陵人知銅梁適山寇攻城泰率士民固  
守城賴以完歲饑賑活甚衆隣邑有爭訟者皆來質  
泰遷御史居官十年止一僕負囊橐歸

黎存信府志醴陵人任永嘉丞性剛正境內淫祠悉  
毀之嘉人立祠祀焉

蔡承植湖廣通志攸縣人萬歷庚辰進士累官南京  
太僕少卿性恬淡持身省約宴客外舉家蔬食而已  
守嘉興俗尚侈靡聞太守高潔不肅而戢時南方郡  
守有四君子之稱承植其一也

莊天合湖廣通志長沙衛人萬歷己丑進士改庶吉  
士授編修侍講筵晉宮僚以端謹受知於光宗庚子  
主試南都甲辰分校禮闈所拔多知名士累進少詹  
事丁外艱歸卒贈禮部右侍郎賜祭葬子以臨蔭授  
中書舍人

歐學啓長沙縣志字省微家貧好學中萬歷丁酉鄉  
試戊戌成進士授河南中牟知縣值內臣專擅學啓  
不爲禮璫廷辱丞尉將以脅學啓士民憤璫不法交  
毆之幾死學啓亦濱於危當事持之得無恙逾年卒  
於任

劉葵楚風補攸縣人身長六尺因號六尺萬歷甲辰

武進士官廣東虎頭衛守備膂力過人兼精書翰嫉惡甚嚴爲讐所中解組歸治扁舟載茶鐫筆床經旬不返與緇徒布衣爲侶貴遊罕得與狎肆力吟咏詩近萬篇當時名士若陳繼儒輩咸傾慕之

劉泉府志字本蒙攸縣人萬歷間由選貢授四川廣元令時礦使四出廣有貢金八兩使將至泉率士民遮阻之使聞不入境廣衛歲餉支給聽於有司泉按季分給盡革常例及令彭水方錄囚泉夜治官書撫案嘆曰深文無法足以殺人因細檢寃狀開大辟七人既爲司理所忌以譖歸奉其父結廬北郭自稱放翁壽九十卒

陳夢珠府志字文卿茶陵舉人萬歷間仕譙南勦白蓮之氛聲著江淮佐郡閩泉值海寇蠢動區畫擒之祀鄉賢

尹靖府志號鄰和茶陵歲貢除江西寧州學訓遷龍泉教諭陞陝西環縣令甫下車力保邊城撫綏殘疆當道稱之爲關西保障致仕歸宦橐蕭然

顏志邦府志號小山茶陵恩貢初任太倉州倅尋擢平樂司理平恕潔清雪理民寃晉永寧知州綏輯兵民撫安猺獞報最屢受褒勅以親老疏請終養

尹近府志字君遠茶陵人隨父敬先之官舟次監利有相者謂敬先當有水厄近聞之流涕因告於天請

以身代遂投水死閱三月尸浮長陽縣之北關面目如生卽葬其地長陽人義之題曰茶陵孝子尹近之墓

羅其綸一統志字彞伯茶陵人萬歷間鄉舉授太康教諭徵修熹宗實錄遷瓊州推官黎人騷動幾二十年綸單騎宣諭殲其渠入其地爲水會所璽書褒獎讞嶺東北獄釋冤辟八十三人累擢郎中年八十四卒筭篋蕭然僅存遺稿

洪倫湖廣通志攸縣人以諸生貢太學性剛直不樂仕進授御史棄官歸隱四世同爨

劉玉溫府志號至和攸縣人孝事繼母歲饑出粟濟貧有貸不能酬者還其券時報富民輸粟賑饑卽舉其二子以應人或訝之溫曰邑人誰有裕於吾子者巡撫上其行賜冠帶旌其盧

江應昂府志攸縣人初任滋陽轉大理同知擢尋甸守敏幹剛決丈田蠲賦必得其平凡盜繫積逋無不辨治

郭諲府志字本明益陽人爲蜀開縣令廉平勤敏直指薦其能當殊擢聞季子捷遽致仕歸以詩酒自娛諲素有志於道從吉州鄒南臯遊最久以子都賢贈天官大夫祀鄉賢

皮輔府志攸縣人知岳池縣剖決如流案無留獄縣

多積逋輔爲捐俸代輸民歌其惠

陳時可府志攸縣人萬歷間副榜廷試授訓導家貧以館穀養親母亡事繼母如所生父亡撫育繼弟如同懷族人  
有嫁娶不給者分束修以成之邑人有父子兄弟不睦者明大倫以誨之兩舉德行祀鄉賢  
龔卿府志號九如湘陰舉人性嚴毅不諧於俗嘗築八景臺爲登眺地怡情山水任四川合江令以鯁直不媚權貴落職歸

陶顯位一統志字仲仁寧鄉人年十六讀易有疑問豐城李氏家傳易學遂裹糧往受業三年學成始歸後任桃源訓導攝縣篆有暮夜投金者卻不受既歸

復以易學授里中年近八十嗜學不衰著有周易說旨

周堪廩一統志字仲聲寧鄉人天啓進士知永春縣調福清治行爲八閩冠擢御史巡按真順等處持法平允多所全活歷遷府尹時河工屢潰以工部侍郎兼副都御史往治數月功成省帑金三十萬上大嘉賚假歸卒

石萬程一統志字仲升湘潭人天啓進士授戶部郎中出守徽州值魏忠賢權黃山開採歲利以數萬計萬程力爭不得卽掛冠去遂奪職崇禎間起知常州遷溫處兵備副使降海寇張弘銘等萬餘人以病乞

休去

石喬松府志湘潭人少孤貧事祖母極孝以教授子弟積穀二千餘石置屋一區與兄弟同居官郡邑京衛學凡二十載所至人慶得師陞永從令征苗有功當遷竟致仕歸

雷寅府志號見川湘潭人中應天鄉試茹苦甘貧所居風雨不蔽一日縣令過其門迎入設具經營久之僅具鱸魚醃卵二品令重其人爲之一飽垂老以詩自娛卒不仕

周聖楷府志字伯孔湘潭人年二十遊京師與竟陵鍾伯敬善見有一夕爲竹枝詞三十首者短之鍾曰

才過此乎爲具楮墨扁戶篝燈自酉達寅得百首伯敬奇之翼日傳播滿長安自是名重天下將四十築湖嶽堂於潭之東偏讀書其中閉門却掃以初服自遂

李道炯府志善化人由明經司訓衡州教士有風範遷鹽亭教諭時奢會蠢動值令缺道炯極力備禦恃以無恐陞遵義教授

鄧昌府志善化人父審嘗爲令昌由舉人知富順縣清賦賑災刻意興學多惠政陞劍州守致仕歸以詩書課子孫兩臺旌之以坊曰光啟

左瑛府志字小喻天啓中舉於鄉署武陵教諭陞南



直和州守時經寇燬僅存孑遺瑛苦心撫輯刑措不用歷任八年陞揚州丞致仕因亂僑寓和州

王國賓府志字用之長沙人少有聲庠序以天啓選貢任浙江常山縣吏才敏給兼攝四邑遇大獄大役咄嗟立辦暇則與文士詩酒盤桓以疾卒於任

王柱一統志字定宇長沙人爲諸生時教授生徒動循禮法太守葛登名延爲子師有同里被誣人命者已抵罪柱力白其寃得釋絕口不言逾時其人始知願以身供役柱力辭之天啓中以貢生授德安教諭遷知繁昌縣在官六載有清名水汛堤潰斥俸緝修築陞無爲知州未赴卒民立祠祀之

黃翼府志字星池長沙進士授知縣歷陞四川叅政勵清操事有利民者毅然行之致政歸常稱貸以給饗殮

吳道升府志善化人嗜學不倦通經史百家家貧事親竭力務得歡心居喪哀毀骨立兄弟同爨不析筋太守旌其門曰孝友文章

周之麟府志字伯良善化舉人侍父入都廷試父卒於途之麟徒步扶喪踵破血枯至會城度不能生囑僕覓舊識舟載之猶朝夕撫棺痛悼抵家一夕卒

黃學謙湖廣通志善化人以恩貢任韶州教諭擢陝西興平知縣少著文名其弟孝廉學僕學良咸侍筆

硯里中知名士多出其門著有紫巖集

李可埴湖廣通志善化人天啓壬戌進士授溧水令調封邱分校鄉闈取士半捷南宮擢南京戶部主事除鳳陽知府爲政方嚴不阿人多敬憚之

黃焜府志字叔闇善化舉人領州牧會詔求直言上書切中時弊欽賜進士御筆改名寰吉特擢兵部職方司員外郎旋陞密雲兵備道有治聲

賀埜湘鄉縣志字尹耕少聰穎早餼膠庠以貢授崇仁潼川教職視篆蓬溪有能聲致仕歸建祠祀祖一倣文公家禮置祭田祭器期以十月朔日舉行立家約嚴規範卽祠前隙地修建義學延師以訓族人

賀從政府志字廷佐湘鄉人知雲南順州訓土官子弟如生徒撫彝民如赤子屢使木邦緬甸秉禮持廉不少假彝酋憚其方嚴乃賂大吏交章薦之擢守廣南府廣南風土惡陋從政撫綏化導一如順州未幾調鶴慶丁父喪歸

陶金府志字仲良湘鄉人以諸生入南雍講求陽明學及宰濟源興寧安縣三邑公廉愷悌士民感戴如一

賀詳府志字約甫湘鄉人讀書一目十行同學者嘗戲記歲歷歷月餘叩之無少遺誤少尙志操以廉隅爲士友所稱領鄉薦時稱三賀詳與武昌逢聖居其

二令安溪以強項致仕

唐彥珩府志字崑嶽湘潭人早孤帶經而鋤成通儒天啓間歲饑盜作倡衆煮粥全活甚衆晚年結勝碧泉葺文定舊祠置田供祀繼母涂病痺以身翼行者三年不懈

蔡承掄府志字翰白攸縣人天啓中副榜授四川合州判涖任廿載廉介自守發奸摘伏多所平反後擢京衛經歷乞休歸

陳論府志字思魯攸縣人篤學力行事母至孝人才多所成就祀鄉賢

吳道行府志字見可善化庠生方七歲聞長者講學肅然傾聽指示忠義大節輒色喜八試不售被褐屢空以著述自見留心經濟凡兵餉馬政之屬剖決利弊皆可見之施行每論時事當道多採納之手輯郡志有典則卒祀鄉賢

譚敬承府志長沙衛人丰標勁挺幼習經書及長學劍術工騎射以武進士掌衛使印務陞守備轉山東僉書修古北口邊城旋擢鄖陽叅將在任七年多所整飭陞黃州總兵征播平之

朱鸞府志長沙舉人爲鳳翔同知寶鷄多劇盜鸞畫策彌之民得安業秦藩被誣力爲辨釋擢戶部員外聞親訃卽行以孝行推重一時

會章府志號月溪茶陵歲貢任平樂府教授精易學  
日引諸子辨析指授貧而請業者食之任滿諸生懇  
留加秩歷任二十餘年

陳所聞府志號印水茶陵拔貢令崇陽崇瘠邑民多  
穴居所聞加意撫字以最報改署固原州州屬邊郡  
爲督撫駐節地兵民雜處吏治棘手所聞戢強綏弱  
寬猛相濟兵民安堵後任江夏治聲益著進秩侍御  
陳有爲府志號五如茶陵舉人崇禎間授靖安令與  
民休息治尚悃悞時值嚴寒父子擁爐念囷圍苦寒  
詰朝檢輕繫者悉出之邑有被誣陷重法者上臺檄  
捕甚急已就繫有爲憐其無辜縱之使歸約日就理

如期赴爲具詳申其寃竟從未減

羅鐔府志字世用茶陵人由選貢授奉新縣佐值縣  
洊饑捐貲告糴饑民多全活百姓感之立祠以祀

譚永壽湖廣通志茶陵人質言篤行家無餘積喜於  
應人緩急嘗割私田以平族爭貸人金以還去婦

廖國遴一統志字孟符長沙人崇禎中登進士授揚  
州推官時內官楊顯名奉使作威國遴糾其專擅調  
保定修城賑饑備嘗勞瘁擢戶科給事中上守邊諸  
策後同鄉熊開元劾周延儒忌者謂疏出國遴手以  
他事下詔獄尋釋歸

關志和府志安化人出粟千石賑饑授七品散官

黃謨湖廣通志善化舉人析產多讓其昆弟置家祠田百餘畝以舉祀事任雲南通判值沐府卒大譁謨往諭之遂定

史記言府志號太初長沙人幼穎敏博文強記問業於門者屢常滿以明經薦後以子貴封兵科給事中孝事祖父訓諸弟子姓黽勉文行親操丹鉛課校之析產自取薄瘠周族賑貧排難解紛有長者風人有誤斃其僕者原其情宥之晚年自號大穆意樂清隱流寇薄郡城捐貲厲兵登陴守禦為鄉邦倚重祀鄉賢

吳紹周府志寧鄉舉人學務實得在官嘗與弟子講

求心性之旨方仕滇衛流寇過境相戒曰此吳青天黎庶也毫不敢犯雲南府藏舊有沒籍二千金紹周悉出之以助征餉賦歸蕭然

周燿冕府志寧鄉人少舉於鄉筮仕東平以廉明奏最陞延安同知築泃水堤以扞黃衝平靖酈崖會舉循卓遽引歸閩里咸宗仰之年八十以子貴誥封朝議大夫卒祀鄉賢

譚元乾府志字文玉茶陵恩貢深於易學任贛州教授時臨川以窩盜誣繫百人元乾白於撫軍得釋臨川人立祠祀之

彭友元一統志益陽人崇禎時母病篤友元痛哭呼

天剖胸掇肝一片烹以進母母食而愈久之餘肝迸出如瘤見者泣下

賀承賁府志安化人入太學授鎮安知縣神情開滌關中目爲仙令比歸尤愛獎勵後進時稱長者  
文典章府志號南華攸縣舉人事繼母以孝聞兄弟九人同居無間言由舉人令溫江有政聲調浙江岷縣新文廟清賦役再補鉅鹿值水災殫力疏導以勞卒於官

賀鳳梧府志益陽人早工舉業通經史嘗從武陵蔣道林游聞求仁之學入國學以上崇正還樸書受知授陝州判謝歸構城南山房講學晚立同人會造就

後進約還樸會以風鄉人其子爲上虞令鳳梧教之力行常平倉法

陳嘉謨府志字益卿湘鄉人坦夷正直工吟咏善草書由舉人任福建知縣兩與分校稱得人後歷山西滇南所至皆建祠以祀

盧傳來楚風補字復郎一字念聲寧鄉人幼穎慧傲誕有輕世之意長而折節日所言動夜必記之以是進德然疾惡如仇見良師友異書則敬若著蔡乙酉選貢不仕晦跡養母所作詩歌及丹鉛古今書盈笥陶汝礪一統志字用我寧鄉人早聘吳氏將娶而吳病瞽吳氏請絕婚汝礪曰旣盟而棄婦將安歸卒娶

之親迎之日吳日復明後知泰順縣以愷悌聞  
郭夢鯨府志安化貢生任平和知縣平礦盜息徭役  
有惠於民比歸士民思之崇祀名宦

王翼謝子龍蕭政張廷椿蕭璉何箴賀紹祖王冲霄  
蔡瑞蔡懋陳廷璽何旺蔡惠周鳳臯皮日昌鄧廣劉  
春林蔡澍陳鈺洪興賢洪田蔡國儀蔡祖洪厚洪祥  
洪模蕭孜蕭俊陳富陳宗戴彭珍劉南箕丁璉王寶  
王萬化陳鵬文炳蔡經王日詔王萬寶王宦王萬用  
劉仁祿楊壽昌歐陽時文陳友文董珍周處倫武廷  
漢丁志淵鄧鵬譚凱王裕龔胥壬易忠則李子韶龍  
圖蔡國伸龍章龍惠譚廷偁陳儲張楚瑤府志俱捐

粟賑饑奉例賜給冠帶

何志高彭羅賜毛溫鑑文凌霄陳善輕譚處善張泰  
春彭雷震洪忠可王槐寬王翰陳受卿府志俱攸縣  
人捐粟賑饑奉勅旌其門

甯若愚府志號春葵長沙人以恩選任雲南澂江通  
判陞雲龍知州所至愛民如子杜絕請託士民愛戴  
若慈母

洪吉臣府志攸縣庠生性至孝事繼母四十九年繼  
母歿廬墓三年而卒尚書李陳玉旌其墓

周旌湘鄉縣志年十四父沒母趙憂憤成疾旌默禱  
於神割其乳煮糜以進母頓愈事聞有司旌之

曾汝京湖廣通志益陽人少孤授徒養母母歿哀毀廬墓敦尙廉隅顏所居堂曰日省值流寇剽掠爲邑令畫守禦策邑賴以全

鄧之馨湖廣通志湘陰人早負才名崇禎癸酉舉於鄉行已端謹時稱古處

吳應台府志字伯能湘陰進士授浦江令時藍寇充斥應台團練鄉勇威行境外賊不能窺浦俗泥形家言多停葬者應台置義塚爲文諭之一時窆者千棺斷疑獄勤月課浦人至今尸祝之祀鄉賢

楊思誠府志寧鄉人早孤家貧事母至孝任徐州汰包攬禁常例徐民感之立祠以祀

楊思震府志寧鄉人自六館迄守陝以才望著執法不撓居親喪飭粥三載所得祿資皆以蠲惠宗族

胡九霄府志寧鄉人三歲失怙孝事嫡母未嘗離左右母終瘠毀蓆苦十餘年及宰廣寧會大羅寇發兵憲劉被執九霄設奇技圍出之斬馘千餘卒於官

洪雲蒸一統志字化卿攸縣人萬歷進士累官嶺南道副使崇禎六年粵寇張文斌等憑險四掠誘擒之平九連山題建連平州賜賚有差擢按察使七年海寇劉香老圍海豐屢挫其衆香老懼乞撫雲蒸單騎按其壘賊留之雲蒸陰檄閩將進勦兵至以雲蒸在不卽攻雲蒸方在賊船急揮手曰毋以我爲念滅此



以報朝廷可也香老怒殺之沈屍海中越五日浮尸沙口有鶴張翼覆之舟人特祀焉

洪懋德一統志字峻明湘鄉人萬歷舉人爲宿松令以清慎著事父至孝罷官歸授徒自給經營諸弟婚學周悉豐贍礦賊破湘鄉肆掠入其家懋德整衣待之容色無變賊無所犯賊退人怪之懋德曰吾不見有賊賊固不吾害也

易道大府志湘鄉人天王寺賊攻掠至潭市道大率姪之璽之璣統鄉兵禦之戰三日斬首數百力竭俱遇害

劉弘化一統志長沙人萬歷進士歷刑科給事首糾輔臣附權貴內臣僭批答有直聲議移宮紅丸之案侃侃不阿會熊廷弼論死弘化力爭之坐受熊賄罷官崇禎初起兵科都給事累遷南大理寺卿以疾歸文士昂府志攸縣人字台仙登天啓中進士初授華陽令地苦燥士昂教民築陂設筒車轉水歲大熟民祠之遷工科給事值陝西河南大饑請勅撫臣賑發無拘常例時邊警屢告力陳中官監軍之弊不見用本邑大洲堡鳳嶺二關隘奸宄出沒奏請分設巡司出爲威茂道陞雲南布政整飭臨安兵備晉太常卿崇禎中假歸里中臨藍賊竊發請建磚城庚申闖賊陷清河獻賊焚皇陵南北隔絕士昂佯狂山谷卒能

全節

周國寶府志字祥卿長沙人明末寇亂國寶侍父於家賊突至欲殺其父國寶力護哀求賊怒砍其手終不忍去賊義捨之

陳世科府志長沙人素以勇聞號鐵脚苗爲司理蔡道憲所拔蔡歿於賊世科自縊於永豐倉其隸劉士鳳亦死之

呂公遷府志吉邸人獻賊陷長沙殉節死

鄧天錫楚風補字培生號石浪湘鄉人由明經累官象州司馬監紀督糧道國變後不仕縱情詩酒居紫雲峯自號紫雲樵者著雪濤園集逸遊草石浪集

馮一第一統志字根公善化人天啓舉人以詩文名張獻忠陷長沙一第將乞師他方賊繫其母兄以招之乃歸賊斷其兩手置營中一夕死母兄獲免從祀忠烈祠有史發二十卷又同邑吳愉崇禎舉人從知府周二南禦賊被殺附祀二忠祠

龍孔蒸一統志字季霞湘鄉人崇禎舉人流寇破長沙授僞職誓死不出尋扶母避寇山中已奮躍上峻坂顧老母在坂下援之遂遇害

潘可受府志號澤山善化人崇禎初恩選遊京師有文名授博羅主簿歷任南寧經歷三署縣篆監厰潯州咸有治績巡按交章薦之值國變歸隱不仕

海南通志 卷之二十一  
吳愉府志號古渡道行子崇禎末歲貢博識能文早  
餽郡庠癸未獻賊陷郡大索名士愉托病深藏闖逆  
犯瀏太守周二南率兵禦之愉從行叅謀與賊遇戰  
於官渡爲賊所執不屈死附祀二忠祠

周繼聖府志字述之長沙廩生幼穎悟八歲從師肄  
業石守道署內卽能以駢詞驚前輩十四補弟子員  
築精室於黑麋峯學益進獻賊陷長沙欲羅致知名  
士將污以僞職繼聖深匿不出賊執其母妻殺之繼  
聖募死士殺賊得仇人殲以祭母湖督何騰蛟上其  
事授儒學教諭痛母妻死節終身不仕

皮振鷺府志字賁生善化廩生豪邁有氣節善屬文  
獻賊陷長沙招賢士爲援鷺與堂弟廩生振毬逃避  
至謝家橋爲遊騎所獲振鷺不屈死全家被害

李先登湖廣通志善化歲貢生善屬文性孝友獻賊  
陷長沙負母逃匿幾不免母歿哀毀垂老孺慕愈篤  
教其異母弟以身爲師其弟與子後先皆領鄉薦  
李世彬府志字青容善化庠生癸未獻賊陷長沙執  
巡按劉熙祚過靳江沿鄉屠戮世彬率鄉勇及家僕  
五十人刃十餘賊力竭被縛賊磔之世彬妻亦被執  
不屈賊砍其足墮崖死

李有斐一統志字非文善化諸生左兵抄掠挈家潛  
山中爲所執身被數鎗夜忍痛負母走母渴取血飲

之復被執死之

陳葵生一統志茶陵人賊寇嚴溪父其鼎被執索貲不獲將刃之葵生號泣入營請貸給賊云歸父執我可得重賂賊信而釋之及賂不至賊詰之葵生曰我貧安從得賂吾代父死耳賊怒殺之

陳來學錢謙益陳孝廉阡表崇禎十年丁丑臨藍賊陷攸縣孝廉陳君拒戰死之君歿之三年子五簋葬君於祖塋後之子午阡君諱來學字開之少強學勵行以大人長德自命中天啓丁卯鄉榜四上春官不第詩書經濟撐腸拄腹將摩勵就選少有以自表豎未行而難作嗚呼其可哀也賊將及郊君告二守弁

當潛兵伏石偽劫其營弗聽既而曰離城三十里結營彼客我主必捷又弗聽賊至旣陣弁遑遽失伍君以腰帛裹頭大呼督戰斬賊首三人賊大至蹙君入室橫刀砍賊中五鎗一刀罵不絕口死石榴樹下君之兄黔寧吏目球學弟諸生瑛與兵民二百餘人皆力戰以死骸骨枝柱無却走者君死於丁丑十二月十七日年四十有三

洪亮臣府志攸縣人獻賊餘黨肆掠亮臣父庠生雲虬挺身罵賊賊怒甚欲殺之亮臣請以身代賊益怒俱被害子經生綸生痛恨悲號賊又殺之

洪法臣一統志字泰哲攸縣人崇禎中拔貢叛將張

克成縱掠法臣責以忠義指陳利害被執罵不絕口死之又同邑王景熙爲總兵鎮武岡亦抗節死

胡乘龍府志字開雲攸縣人少具幹才爲南藩戶椽崇禎癸未奉使川湖經畧過巴陵獻賊執之授以官弗就繼脅以刃幽囚七晝夜不少屈賊黨義而逸之得生還

洪業嘉府志字伯修懋德子讀書過目成誦與弟名嘉俱有文名性倜儻不治生產慨然有遠引之志後爲亂兵所執遂被害

謝肇元一統志湘潭人崇禎進士知嘉定州請裁溢額稅著祥刑錄息訟轉戶部郎累遷按察使鎮穎壽

時獻賊蹂躪城邑肇元躬環甲橫戈冒矢石賊多授首境內獲安以勞卒贈太僕寺卿

李馭芳湘潭縣志騰芳弟性淳篤不以聲華自耀舉鄉薦二十餘年己丑殉城死遺孤一歲人皆傷之

唐韻一統志湘潭諸生張獻忠陷城與父鶴翔母錢氏俱被執賊殺錢韻拊屍慟哭求死賊憐而釋之韻終抱屍不去泣血數日死母旁

周星府志字九烟湘潭人父逢泰宦遊生星於江南爲上元黃氏撫養遂昌其姓七歲工書法十二入南監積分中鄉榜成進士授職不就歸潭葬父畢復返上元詩古文直逼古人選唐詩三集行世明亡赴水

死

黃甲府志湘潭庠生與子文炳為獻賊所執大罵賊怒同時被磔

唐登岱府志字觀海萬歷間副榜以薦辟任光祿寺丞崇禎癸未殉難於京

譚孔昭府志湘潭庠生被獻賊執猶拈詩吟哦賊怒殺之

陳五魁府志攸縣人崇禎中為光祿丞加通判銜守慈利賊破常德同子治策抗節死

彭應睿府志字藻臣茶陵人以貢授學博歷任雲間潤州漢陽巴陵臨藍之寇將逼巴邑舉城狂奔應睿

獨止坐明倫堂靜鎮如平日歸里後徜徉山水未幾亂兵入茶不屈遇害

吳從明一統志字信可湘陰人崇禎間由舉人知遵義縣多惠政擢蘇州同知督運為闖賊所得死之

婁琇一統志字元夫湘陰人天啓舉人崇禎中知涇州李自成犯城琇招募義勇為拒守計邑人感其忠協力固守賊悉眾攻之城陷被執慷慨就戮罵不絕

口妻亦不屈被殺事聞贈太僕卿

黃鳳德一統志湘陰人張獻忠陷長沙知縣楊開退保白鶴山為恢復計鳳德左右擁衛佐召募賊怒先

捕開并家屬十七人沈於河乃磔鳳德并戮其妻

蔣儒德府志字克明湘陰貢生孝事繼母友愛諸弟篤族誼樂拯人急閭黨敬之闖賊之變儒德被執同輩十餘人先後斃白刃忽賊中一人躍起抱之曰此好相公不可殺遂得釋蓋常諳其素行故也

鍾調元邵受璉程可行鍾楚貴府志俱爲湘陰縣隸知縣楊開被賊執四人從之不離左右賊怒並殺之喻成龍府志號濬川湘陰人萬歷間由貢生知四川榮陽縣省刑薄歛救旱濟荒歷九年遷重慶同知奉命運邊餉遇賊不屈死

洪懋孝府志字達甫湘鄉貢生明末知世將亂嘗如醉痴堅臥一室不問家事及亂作長嘆謂家人曰世已如此吾生何爲沐浴服公服題詩於書齋柱間自縊死時方亂離三日方斂容貌如生人皆歎異之

凌國俊府志字端甫湘鄉人爲長沙推官隸役崇禎十四年流賊陷城推官蔡道憲罵賊死國俊哀號不去乞收道憲屍殮葬葬畢自縊死今附祀蔡公祠

陳受堯府志字君德湘鄉人崇禎間以平天王寺賊有功授麻陽守備署監軍道題授副將鼎革隱居終彭日浴府志字孺子寧鄉庠生少孤事祖母至孝癸未獻賊竊據歎曰危邦不入吾將焉之遂絕跡城市會賊脅名士授僞官乃奔芙蓉積雪諸洞避之草罵賊詩十數首納衣帶中尋被害

姜中洽府志字心我寧鄉庠生崇禎末寇盜蜂起中洽聚鄉團嚴守望賊不敢犯時安化賊燄甚虛將趨新康抵潭州中洽扼其吭賊不能逞太守堵胤錫遣將余昇與賊戰敗死中洽亟發團兵夜斫賊營盡殲之收昇尸送長沙并於其死所建廟祀之太守嘉其忠勇薦授雲南都司不就構樂天亭以終老焉

林朝憲府志字耀宇長沙人崇禎末寇黨橫行朝憲捐金散粟練集義勇擒其渠魁錄功題授遊擊癸未張獻忠陷郡城遣僞軍師劉秩輔卑辭誘致不從築保固守與賊相持乙酉李自成餘黨瀰漫鄂岳將寇長沙朝憲扼守要害殺賊甚衆督撫疏請除授總戎

不就

張爾晟寧鄉縣志明福清王府儀賓也王聞其聰慧遂妻之明法郡主下嫁舅姑先行拜禮晟曰婦人從夫吾父母爲若舅姑豈可使敗法壞紀自王朝始王聞益愛重時其祖少江年九十八王卽日題封壽官賜四品大夫妣封恭人王欲官其兄弟爾晟辭曰功名貴自建立因親戚致顯恐遺後人羞及莊烈死社稷爾晟流涕曰我王家儀賓義不與賊俱生與郡主同縊死遺子燾爲賊掠去其從兄武魁覓還之

胡衷煥寧鄉縣志性篤孝年十四遭明季亂遇賊煥冒白刃以身翼父母賊感釋之後又爲賊携去予僞



職不從脅以兵不爲動乘間脫歸父母已歿乃廬於墓側時多虎患煥獨苦塊於深林叢箐中虎爲辟易周世美府志寧鄉廩生張獻忠破寧鄉大索紳士世美與陶燧劉爲邦等抗賊不屈被執戮於北郊是日晝霾如夜子廩生希麟與世美俱被縛希麟厲聲罵賊不絕口賊怒斷其首

黎復淳府志字樸生寧鄉人年十六食餼癸未秋獻賊擒文士迫授僞劄復淳厲聲大罵誓死不從賊以刀築其膝罵益厲復截其吻罵如故賊乃斷其頸而磔之時年二十五

謝所舉府志湘潭舉人令湖口時左良玉兵所過殺掠他邑令皆棄城走吏有以引去爲言者應曰吾安逃急須自往有如不得當卽死此耳嚴具糗糧牛酒挈舟入左營見良玉涕泣開陳良玉壯之一軍咸驚旣而詰曰有所請乎曰無但乞一早字耳良玉笑曰解人卽勅諸軍無輕犯湖口邑賴以安爲立生祠尋擢衢州同知以病乞休歸

譚思敬一統志湘潭人與子清遠俱以義勇聞張獻忠陷湘潭大掠村落思敬父子大殲賊衆獻忠怒夜督千騎圍其家思敬父子力戰潰圍去後被執爲賊所磔

董八郎府志安化人崇禎間土寇焚劫其伯父冰鑑

率衆禦之沒於陣八郎挺身赴救奮擊數人被傷死  
楊會英一統志字嘉士寧鄉人天啓舉人歷國子學  
錄擢兵曹闖賊陷京師不屈死又同邑彭月浴獻賊  
脅授僞職不受死之有罵賊詩十數首

朱之梗寧鄉縣志廩生明李賊陷寧鄉被執不屈罵  
賊甚厲賊焚之投其屍於水

陶燧歲貢生劉爲邦朱國昌朱治昌湯道揆劉光賢  
周易俱庠生寧鄉縣志獻賊至寧燧等守義不往迎  
俱被害於邑之北郊案同時殉難者凡一百三十餘  
人舊志未詳其姓名歷久已無可考惟陶燧等七人  
姓名尙存

朱慈祚寧鄉縣志幼穎悟長食餼工詩古文兩薦省  
元不遇教胞弟惠忠恕懋四人皆補弟子員甲申正  
月十四日獻賊陷寧邑被執抗罵賊怒遇害弟惠忠  
亦死之周尙書堪賡輓之有兄弟同胞三與難之句  
溫奇玉府志字崑來益陽庠生癸未冬爲獻賊所執  
厲聲大罵賊斷其雙手而死  
潘若洙府志益陽貢生爲獻賊所縛罵不絕口酷刑  
數日以死弟若鴻邑庠生以身衛兄賊刖其手旣死  
復甦逾半月號泣不已亦卒

王景熙府志字世伯攸縣武舉崇禎初任武岡守備  
以平臨藍賊及八排諸徭功陞都司歷轉總兵鎮武

岡寶慶失守死之

鄭崇儉明史列傳字大章寧鄉人萬歷四十四年進士授河南府推官歷濟南兵備副使崇禎初遷陝西右叅政屢遷右僉都御史巡撫寧夏數敗套寇十二年擢兵部右侍郎代洪承疇總督陝西三邊軍務五月張獻忠反穀城羅汝才等九營皆反與安告警總理熊文燦請敕楚撫方孔炤防荆門當陽鄖撫王鰲永防江陵遠安陝撫丁啓睿蜀撫邵捷春各嚴兵於其境而崇儉主提兵合擊時固原臨洮寧夏三總兵左光先曹變蛟馬科隨承疇入衛柴時華中道還甘肅徵之不應崇儉乃檄副將賀人龍李國奇等軍發

西安國奇至洛陽卒大譟剽瑞王租崇儉坐貶一秩獻忠既叛大敗左良玉軍於房縣之羅猴山謀入陝崇儉率人龍國奇軍扼之與安賊還走與山太平處楚蜀交是時楊嗣昌已出師入文燦軍而代之矣先是尙書傅宗龍議令崇儉兼督蜀軍而嗣昌亦檄秦軍入蜀崇儉乃以十三年二月率人龍國奇會良玉大敗賊於瑪瑙山獲首功千三百三十有三降賊將二十有五人獲馬羸甲仗無算及論功所賜半嗣昌但增一秩復先所降一秩而已獻忠既敗竄柯家坪蜀將張令追之被圍崇儉遣兵擊賊走人龍國奇等復追敗之寒溪寺鹽井先後斬首千五百級其黨順

天王一條龍一隻虎皆降崇儉軍五日三捷威名甚振以年衰乞骸骨不許令率總兵鄭家棟還關中留人龍國奇討賊當是時獻忠竄伏興歸山中秦楚師俱集於夔諸將協心窮搜深箐千餘殘寇可盡殲崇儉既去未幾人龍軍亦自開縣譟而西歸楚師遂敗績於土地嶺蜀中由是大亂嗣昌因言崇儉撤兵太早致賊猖獗帝初以崇儉不能馭軍不悅自是命削籍以啓睿赴軍前代理而疑崇儉託疾令按臣核實明年春獻忠陷襄陽嗣昌死帝益恨崇儉不犄角平賊也逮下獄責以縱兵擅還失悞軍律不俟秋後以五月棄市福王時給事中李清言崇儉未失一城喪

一旅因他人巧卸遂服上刑羣臣微知其冤無敢訟言者臣甚痛之崇儉冤始白

文昌拱一統志醴陵人性孝友喜讀書爲賊所執詞氣慷慨抗節而死

蕭偉一統志字豈凡長沙人崇禎中武舉授王會都司尚蠻爲寇偉單騎深入陷蠻死之姪鍵武學生亦以勇力著獻賊陷郡不屈死

陳有光湖廣通志益陽人天啓丁卯鄉舉任推官丁父艱歸獻賊破長沙脅紳士官之有光抗義不屈執其母有光不得已至賊營賊喜釋其母度母已至家遂扼吭而死

鍾鳴謙府志益陽人崇禎癸未被賊執奪刀罵賊不屈而死

符永膺府志益陽人獻賊攻益陽永膺負父逃石嶺被執不屈賊斷其手久之始蘇

楊啓華府志字禹心寧鄉人十歲能文質樸沉潛攻苦舉業喜爲深奇拔俗之言獻賊至迫脅諸名士甚急憂不得免日繞室行歎恨書空閉門而死

易應達一統志益陽諸生獻賊之亂舉家避山中父咸寧被執應達挺身請代因遇害父得不死

謝承任一統志茶陵人襲指揮使崇禎末調貴陽粵寇萬餘蹂躪猖獗令委城去承任督羸卒誓守城陷

被執罵不絕口遂遇害事聞勅建廟祀之

陳士藻府志號太乙茶陵人由歲貢授通判值獻賊掠茶迫以就職士藻指江怒罵曰寧葬魚腹豈肯從犬豕遊乎遂投河死

譚景行府志湘潭進士己丑湘潭城破與同邑推官周銜周侯舉人謝璵王元兆貢生嚴士琦庠生王載謝真生王蒙俱死之庠生黃文炳罵賊爲賊所磔

譚景悅蕭贊府志俱湘潭庠生爲獻賊所執罵賊死

胡湛一統志字秋水攸縣武舉官把總崇禎末臨藍賊犯攸湛率鄉勇力戰死賊亦潰詔贈官

郭金臺本傳字幼隗湘潭人本姓陳氏名湜字子原

生而超穎狀貌秀偉識者咸目爲異人年十五遭家難賴中表郭氏卵翼得脫郭氏初無子遂繼之弱冠有聲黌序讀書目十行下經史百家貫穿經緯詩古文詞下筆累千萬言力追正始居家孝友恂恂如不能言至慷慨談天下事議論風生諸監司郡邑長旌幣接踵吉藩禮文儒延致邸館置醴賦詩常爲倒屣迎崇禎己卯壬午兩中副車時舉行積分法方破格用人朝士屢以名薦不起例授官亦不拜隆武南渡登賢書督師何公雲從堵公牧遊先後論薦授職方郎中再起監司僉事皆以母老辭當是時潰卒猖獗百里無烟乃請於督師命偏裨主團練力率鄉勇鍛矛戟峙糗芻鄉人全活者以數萬計獻賊陷湖湘金臺隱衡山著書授徒絕口不復談世事凡論列當時殉難諸人至忠孝節義未嘗不欷歔感慨三致意焉及卒自題其墓曰遺民郭金臺之墓

譚紹琬府志字琰卿茶陵人十八食餼以恩薦貢成均湘陰令以誣被黜罪且不測紹琬爲申其枉令得釋携金謝之却不受明亡遁跡巖壑以逸民終傳希顏府志字哲我安化人崇禎時牛賊爲亂衆至十萬道經安化希顏與里人避賊山谷數日無食希顏出偵賊遇其前鋒獨拒險力鬪奪賊刀手刃數人賊潰衆得全

周敏中一統志益陽人知清流縣張獻忠破城爲賊所執敏中不屈索冠帶賊弗與敏中厲聲罵賊死之又同邑鍾鳴謙吉藩內史呂公還並殉獻賊之難王二南府志號放叟茶陵貢生力學篤行以孝友聞甲申之變全髮高蹈後被逮絕食七日不死經畧洪承疇疏雪放還

郭都賢湖廣通志益陽人天啓壬戌進士授行人陞江西提學號稱得士累遷都御史巡撫江西黜貪墨獎循良冰霜凜凜人不敢干以私凡關國計民生章疏反覆必待奏可乃已晉兵部侍郎歸後隱於僧

蔡之駿府志號遇伯攸縣人崇禎時拔貢官至廣西右江道治績有聲後掛冠歸潛居林下四十年壽九十二與其父承賚同祀鄉賢

陶汝鼐府志字仲調號密菴寧鄉人生有異徵少奇慧工古今文詩賦詞翰並爲海內所推有楚陶三絕之譽初以里選入成均試積分科懷宗賞其文特賜第一題名勒石太學授五品官秩仍留館肄業癸酉舉於鄉丁丑癸未兩中會副授翰林院待詔陞簡討請告歸里生平孝友天植父歿哀慕終身竭力事其母處昆季宗黨篤至類古行誼居鄉持正多厚德事嘗爲人雪枉救患及冒兵難生活千餘人尤人所不能及云康熙二十五年祀鄉賢所著有榮木堂集廣

西涯樂府行世

張孟一統志寧鄉人儒家子以貧傭書於孝廉楊某家獻賊至楊被執孟於萬軍中突呼而前求代死賊為感動遂得釋

通志卷之一百九終



